

Dörfligeischer 2015

Mir Geischer sy hüür ganz guet druff, dir chöit üs das jetz gloube,
Äs git do würklech nüt, wo üsi Rueh cha roube,
Üs isch äs glych, ob d' Sunne schynt oder obs tuet schiffe,
Üses Gheimrezäpt das geit eso: zwüschine eis go kiffe !

Hüt zobe heit dir's alli luschtig u chöit öii Sorge vergässe,
Tüet do zäme lache u schunkle, und derzue no öppis ässe,
Sicher isch bi däm Menu ou äs schöns Stück Fleisch derby
Mir hoffe eifach für euch alli, das sig nid vo Carna Grischa gsy !

Nach däm Pfadi-Fescht dört in Orpund, chunnt dr Hansli ufgregt hei,
U seit zum Mami: das isch geil, was mir alls cools gmacht hei,
Hei Hütte bouet, Füürli gmacht, mit em Hammer dörfe töpperle,
U bis spät i die dunkli Nacht mit Meitschi chönne dökterle !

Zmitts ir Stadt steit üsi Zyt immer no gäng still,
Jetzt wott me die Uhr doch no flicke, so der lieb Gott will,
Doch dänket dra, äs git do eis, wo jede Bieler wott :
Bouet e Schwyzer Uhr dört i, alls angere isch Schrott !

Üses Tennis-Ass dr Roger Federer, isch beliebt uf der ganze Wäut,
Är isch haut bliebe wie när isch, trotz sim huffe Gäut,
Es paar Roger Federer ir Fuessball-Nati, das wünschte mir üs ou,
Dä macht bekanntlech mit jedem Schuss immer grad zwöi Gou !

Dr Beat Feurer hett äs Puff, im Sozialamt tuets nid loufe,
U jede tuet dört inne der anger für dumm verchoufe,
De einte gfaut das öppe nid, die angere chöis nid verstah,
Dass nid jede frömde Gascht gäng grad e BMW muess ha !

Dr Summer letscht Jahr dä isch scho nachem Früehlig schier verby,
Sicher heit Dir öich ou gfrog: Wo isch all das Wasser hii ?
Im Strampi hesch zwüsche de Zähje schier Schwümmhüt übercho,
U für das hesch de nid emou is Bassin müesse stoh !

Ds Einzige wo z' Bieu nid stigt, das isch dr Satz für d' Stüüre,
Dernäbe stige süsch derfür angeri Gebühre,
Parkiere ir Stadt wird immer türer, heit dir's ou langsam satt,
Gly fahrsch billiger mit em Taxi, als mit em Bus i d' Stadt !

E Duschtrennwand cha me jo vergässe, das wär no nid so schlimm,
Dass d' Ischmaschine nid i Lift tuet passe, das geit üs nid rächt i Gring,
Mir hoffe das geit nid so witer, obwous d' Spatze vo de Dächer chräje:
Uf dr Ischflächi sig si schyns scho dranne, grüne Rase z' säje !
